

նորին՝ և նոր 'ի նորոյ զարդարել ամենայն պիտոյիւք, և պատրաստել զնա իբրեւ օթեւան Կուսակալի, և սահմանել յամիսն 2000 դահեկան 'ի պէտս խոհանոցի. նոյնպէս 1900 դահեկան Մուվելլային և Ճարտարապետին՝ ակն ունելով թերեւս օգնութիւն գտանել 'ի նոցանէ. Յետ այնորին՝ պատմէր Նուրի էֆէնտի առանձին Պատրիարքին և միաբանացն Հայոց զանցս Դամասկոսի. թէ ո՞րպէս չյօժարէր Կուսակալն իմանալ զմիտս հրովարտակին, և հանապազ երկրորդէր, թէ զարմանալի իմն է գործ Տէրութեան. զի յառաջագոյն Յունաց ետ հրովարտակ, այժմ Հայոց. և զինի աւուրց ինչ զարձեալ Յունաց 'ի թախանձելն նոցա. Առ այս տայ պատասխանի Նուրի. թագաւորն 'ի միջոցի չորից ամաց ետ դատ վարել 'ի 12 նիստս և ունկնդիր եղեւ. և յետ այնորիկ հրովարտակօք առաքեաց զմեզ 'ի կողմանս յայտոսիկ. իսկ դուք ո՞րպիսի եղանակաւ կամիք իմանալ զմիտս նոցին. և որպէս վայելէ մեծի իշխանութեան ձերոյ, գրով (պուշրիւտի) և ոստիկանաւ առաքեցէք զմեզ յերուսաղէմ և զհրովարտակն տուք արձանագրել աստ 'ի Դատարանի, և ջնջել զարձանագրութիւնն առաջին հրովարտակին տուեալ 'ի թուին 1892 և նշանակելով զայն 'ի հրամանագրի ձերում. ապա թէ ոչ, տուք մեզ պատասխանի՝ Իլամ և նամակ. զի մեք զարձացուք առ Արքայն որ առաքեացն զմեզ. Զարմացեալ Կուսակալին ընդ համարձակ բանս առնն, հրամայէր կատարել զամենայն ինչ ըստ հրամանի Արքային. Ապա գրեաց հրաման սաստիկ և կարգեաց ոստիկան զհաւատարիմն իւր. Յետ այնորիկ ազդ արար նմա Նուրի զգաւաճանութիւն Սօճաքեանին. փորձեալ զնա յընկերակցութեան իւրում 'ի ճանապարհի, և ուսուցանէր զգուշանալ 'ի նմանէ. և մեք սիրով վարիմք ասէ՝ ընդ նմա. զի թերեւս կարասցուք հասանիլ 'ի նպատակ գործոյս.

Սօճաքեանն յերուսաղէմ միայն պատիր բանիւք 'ի վերին երեսս յուսադէր զՀայս. իսկ ոստիկան Կուսակալին յայտնի համարձակ խրախոյս տայր չերկնջիլ բնաւ. զի ամենայն ինչ առէր՝ ըստ հրամանի Արքային և տեսաւ իմոյ Կուսակալին ունի կատարիլ. և եղեւ վերստին շօշափել Հայոց զերակ դատաւորին, գտին զնա դեղեալ, հիւանդ